

A D

MÆCENATES

S U O S.

V Ade salutatum notos, mea Musa, Patronos,
 Qui mihi suppetias sæpe dedere pias.
 Atq; opta ut Pylios peragant feliciter annos,
 Quæis nostri in duro tempore cura fuit.
 Dissimilesq; mei sortem experiantur amicam,
 Et votis habeant cuncta secunda suis.
 Tempus ad hoc vixi, rixis & lite solutus,
 Nil metuens rigidi jura severa fori;
 Nunc non solvendo, legum vinclisq; ligatus,
 Heu vereor coeco in carcere dura pati.
 Nec quibus eripiar rationibus est mihi certum,
 Vos nisi, gens hominum fida, feratis opem.
 Dispudet auxilium toties exposcere amicos,
 Quorum larga mihi est usq; reperta manus.
 Sors at iniqua jubet quidvis tentare, pudore
 Posthabito, ut fugiam quæ mala carcer habet.
 Quare ego vos supplex, ne quis ferat ægrius, oro;
 Nam durum telum est squalida pauperies.

W. D.